

13/11/1998

Usah biar bangsa kita dibuli orang luar

Cikgu Kemahiran Generik

KEGAWATAN di negara kita berterusan. Bermula dengan kegawatan ekonomi kini merebak kepada kegawatan nafsu amarah manusia.

Wahai saudara seagama. Cuba renung dan berfikirilah kita. Kita sekarang sudah berada di rahang mulut orang asing. Perancangan yang begitu halus dan teliti dilakukan oleh orang luar untuk menjatuhkan Perdana Menteri yang kita kasihi. Apa yang dicakapkan oleh Datuk Seri Dr Mahathir Mohamad memang bertepatan dan kena pada batang hidung orang Barat. Sikap Barat yang hipokrit semuanya jelas. Ringkasnya Barat bercita-cita mengawal dunia ini dan membuli bangsa lain.

Dalam keadaan seperti ini, orang luar akan memasukkan sedikit saja racun. Kita akan dilaga-lagakan untuk membunuh saudara kita sendiri yang beragama Islam. Orang Islam seperti ini akan menggunakan topeng Islam untuk menghalalkan apa cara yang mereka lakukan termasuk kekerasan.

Semua tindakan yang dilakukan ini amat sedikit sekali menguntungkan orang Melayu tetapi risiko yang lebih parah akan ditanggung oleh bangsa kita seumur hidup.

Semua tindakan itu adalah bertujuan supaya kepemimpinan yang tidak secukup dengan Barat dijatuhkan walau dengan apa cara sekalipun. Ekonomi negara kita tidak akan dapat dipulihkan, dengan itu kita akan melutut menyembah mereka.

Perpaduan orang Melayu dan Islam akan hancur berkecai. Selagi perpaduan tidak dihancurkan susah untuk orang asing menjalankan dakyah jahat mereka. Perpaduan sering dilaungkan oleh pemimpin, tetapi masih ramai tidak menghargainya.

Tindakan golongan itu juga melahirkan suasana tidak tenteram di dalam masyarakat. Surat layang, berita yang dipaparkan melalui Internet sengaja diada-adakan bertujuan menakutkan masyarakat supaya mengambil tindakan drastik untuk menjatuhkan suara majoriti.

Wahai saudaraku insaflah! Kasihanlah anak-anak bangsa kita yang masih berada di bangku sekolah hari ini. Berilah peluang mereka mengecapi keamanan dan membesar di dalam kebahagiaan. Nikmat kebahagiaan dan keamanan sesuatu anugerah yang besar diberi oleh Allah. Jagalah.